

Crux fidelis

(b 29 [1, 7-10]; English version p. **Error! Bookmark not defined.**)

*Crux fidelis, inter omnes
arbor una nobilis:
nulla silva talem profert,
fronde, flore, germine.
Dulce lignum, dulces clavos,
dulce pondus sustinet.*

1. Pange, lingua, gloriosi
lauream certaminis,
et super crucis trophaeo
dic triumphum nobilem:
qualiter redemptor orbis
immolatus vicerit.

Crux fidelis ...

2. De parentis protoplasti
fraude factor condolens,
quando pomi noxialis
in necem morsu rui,
ipse lignum tunc notavit,
damna ligni ut solveret.

Crux fidelis ...

3. Hoc opus nostrae salutis
ordo depoposcerat:
multiformis proditoris
ars ut artem falleret
et medelam ferret inde,
hostis unde laeserat.

Crux fidelis ...

4. Quando venit ergo sacri
plenitudo temporis,
missus est ab arce Patris
natus, orbis Conditor
atque ventre virginali
carne amictus prodiit.

Crux fidelis ...

5. Vagit infans inter arcta
conditus praesepia,
membra pannis involuta
Virga Mater alligat:
et Dei manus pedesque

stricta cingit fascia.

Crux fidelis ...

6. Lustra sex qui iam peregit
tempus implens corporis,
sponte libera Redemptor
passioni deditus,
agnus in Crucis levatur
immolandus stipite.

Crux fidelis ...

7. Felle potus ecce languet,
spina, clavi, lancea,
mite corpus perforarunt,
unda manat et cruor:
terra, pontus, astra, mundus,
quo lavantur flumine.

Crux fidelis ...

8. Flecte ramos, arbor alta,
tensa laxa viscera,
et rigor lentescat ille,
quem dedit nativitas:
et superni membra Regis
tende miti stipite.

Crux fidelis ...

9. Sola digna tu fuisti
ferre mundi victimam:
atque portum praeparare
arca mundo naufrago:
quam sacer cruor perunxit,
fusus agni corpore.

Crux fidelis ...

10. Sempiterna sit beatae
Trinitati gloria:
aequa Patri Filioque,
par decus Paraclito:
unius Trinique nomen
laudet universitas. Amen.

Crux fidelis ...